

NAQQIUT

Siunnersuut 12. august 2019 ullulerneqartoq taarserpaa

Tunngavilersuut

Teknikkimut oqaatsinullu tunngasunik ataasiakkaanik allanngortitsisoqarpoq, kiisalu siunnersummi § 33 f-imi paasissutissiussaatitaaneq erseqqissarneqarluni.

Siunnersummut nassuaatit

Nassuaatit nalinginnaasut

1. Aallaqqasiut

Kalaallit Nunaat Global Forumimi ilaasortaalerpoq. Nunani tamalaani akileraartarnikkut peqquserluttoqaratarsinnaanerata annikillisarneqarnissaa suliniaqatigiiffiup suliassaraa. Tamanna ilaatigut ingerlanneqassaaq nunat ilaasortaasut akileraartarnikkut attuumassuteqartunik paasissutisseeqatigiittarnerisigut. Taamaalillutik Naalakkersuisut Akileraaruserinermik ingerlatsineq pillugu Inatsisartut inatsisaanni § 35 a, (akileraaruserinermik ingerlatsineq pillugu inatsit) tunngavigalugu atuutsilerpaat aningaasatigut kontunik nunanut allanut attuumassutilinnik kinaassutsimik uppermarsaasarneq nalunaaruteqartarnerlu pillugu nalunaarut nr. 13, 30. august 2017-imeersoq (CSR) aammalu aningaasanut kontut USA-mut attuumassuteqartut ilisimanissaat nalunaarutigineqarnissaallu pilligit nalunaarut nr. 5, 3. maj 2017-imeersoq (FATCA), taakku malillugit nalunaaruteqartussaataasut (maanna aningaaseriviit marluk) qaammatisiutit ukiuata nalunaaruteqarfissamut attuumassuteqartup kingorna kingusinnerpaamik ulloq 1. maj paasissutissat nunani allani akileraartarnermik oqartussanit soqtiginaateqarsinnaasut nalunaarutigissallugit pisussaapput.

Aningaasatigut kontunik nunanut allanut attuumassutilinnik kinaassutsimik uppermarsaasarneq nalunaaruteqartarnerlu pillugu nalunaarut nr. 13, 30. august 2017-imeersoq naapertorlugu ulloq 1. maj nalunaaruteqarnissamut killissarititaasumit sivikinnerpaamik ukiuni 5-ini paasissutissat paarlaassissutigineqartussat nalunaartussaataasut paarisassagaat nunani tamalaani atuuttussatut Global Forumimi isumaqatigiissutigineqarpoq. Piumasaqaatip tamatuma Kalaallit Nunaannit malinneqarnissaata qulakkeerneqarnissaa siunnersuutikkut anguniarneqarpoq. Taamaalilluni nalunaaruteqartussaataasut malittarisassanut sanilliullugu qaammatinik 4-nik sivisunerunermik paasissutissanik paarinnittussaatitaassapput.

OECD-p nalunaaruteqartussaatitaanermik ataatsimut periusia malillugu piumasaqaataavoq inatsisinik atuutsitsisut aningaaserivinnut nalunaaruteqartussaatitaasunut periuseq malillugu qanoq piumasaqaateqarsimanertik nalunaarsortussaavaat aammalu periuseq aalajangersimasoq malillugu suliffeqarfinnik tigusinerit/suliffeqarfiit kattunneri pillugit misissuinerni periaatsinut atatillugu uppernarsaatit atorneqartut nalunaarsortussaallugit. Nalunaarsukkat taamaattut piffissami sivisumi pissarsiarineqarsinnaassapput ataatsimut isigalugu periuseq malillugu aningaaseriviit nalunaaruteqartut paasisutissat nalunaarutigineqartussaatitaasut tunniunneqarfissaata kingorna sivikinnerpaamik ukiuni 5-ini pissarsiarineqarsinnaassallutik. Nalunaaruteqartussaanermi ataatsimut periutsimi immikkoortoq IX-mut "Standard for Automatic Exchange of Financial Account Information in Tax Matters"-imi tamanut saqqummiunneqartumut OECD-p oqaaseqaataani imm. 7-imu tamanna allassimavog. OECD-p periusia malillugu atortussat nalunaaruteqarnermi tunngavigineqartut, tassungalu ilanggullugit suliffeqarfinnik tigusinermi/suliffeqarfiit kattunneranni periutsinut aningaasatigut kontut nalunaarutigineqartussaasut suussusersiniarlugit ingerlanneqartunut tunngavigineqartut piffissap nalunaaruteqarfiusussap naaneranit ukiuni 5-ini taamaalilluni paarineqartussaapput. Aningaasatigut kontunik nunanut allanut attuumassutilinnik kinaassutsimik uppernarsaasarneq nalunaaruteqartarnerlu pillugu Namminersorlutik Oqartussat nalunaarutaanni nr. 13, 30. august 2017-imeersumi § 107 naapertorlugu nalunaaruteqarnissamut killissarititaavoq qaammatisiut ukiuata nalunaaruteqarfiusussap kingorna ulloq 1. maj. Ulloq 1. maj arfininngornermiippat, sapaammiippat imaluunniit ulluni nalliuuttiipi killissarititaasoq tassaavoq taakku kingorna ulluinnaq, tamanna aamma atuuppoq aningaasanut kontut USA-mut attuumassuteqartut ilisimanissaat nalunaarutigineqarnissaallu pillugit Namminersorlutik Oqartussat nalunaarutaanni nr. 5, 3. maj 2017-imeersumi § 69-imut atatillugu.

Tamanna tunngavigalugu OECD-p nalunaaruteqarnissamut ataatsimut periusiata nunatsinni atuutsinneqalernissaata misissorneqarneranut atatillugu Global Forum on Transparency and Exchange of Information for Tax Purposesimit uparuuarneqarpoq paarinninnissamut piffissaritinneqartoq pillugu nunatsinni inatsimmi OECD-p Global Forumiata periusia malinneqanngitsoq.

FATCA-mi paasissutissat nunat tamalaat Global Forumimi periutsimi ilaatinneqanngillat, taamaakkaluartoq inatsit ataqtigisiissinniarlugu paasissutissat taakku ilanggunneqarnissaat siunnersuutigineqarpoq. Taamaaliornikkut aningaaseriviit nalunaaruteqartussaatitaasut FATCA aamma CSR-imi paasissutissanik uninngatitsinerminni ataqtigisiissaarinerat pisariinnerulissangatinneqarpoq.

Aammattaaq siunnersuut aningaasaqarnermik avitseqatigiinnerup iluani akileraarutinik eqortumik akiliisarnerup nukitorsarneqarnissaanik kissaateqarnermut takussutissaavoq.

Aningaasaqarnermik avitseqatigiittarneq suliassaqarfiuvoq sukkasuumik ineriertortoq. Tassani ingerlatsinermut ilusiliaq pineqarpoq, inuinnaat kiffartuussinernik tuniniaasarlutik imaluunniit pigisaminnik tamakkiisumik atunngisaminnik attartortitsisarlutik.

Aningaasaqarnermik avitseqatigiittarnermi ingerlatarineqartartunut qitiusumik ilisarnaataavoq allap tuniniaasup ujartuisullu akornanni attaveqartitsisarnera. Alla aallaaviusutut suliaqartarpoq, tuniniaasumik ujartuisumillu ataatsimoortitsiviusumik. Aallaaviusoq amerlanertigut digitalimik ingerlanneqartarpoq aammalu digitalimik aallaaviusumut piginnittooq nalinginnaasumik tassaasarluni ingerlatseqatigiiffik.

Aningaasaqarnermik avitseqatigiittarnermi suliaqartut, pisuni amerlasuuni niuerfinni aamma nalinginnaanerusumik inuussutissarsiutigalugulu suliaqartut suliaqarfisartagaanni, suliaqartuuusarput. Aningaasaqarnermik avitseqatigiittarneq aammalu nalinginnaanerusumik nioqquqissanik kiffartuussinernillu sullissinerit, akileraartarnikkut assigiinngissuteqanngillat.

Aningaasaqarnermik avitseqatigiittarnermi ingerlatat akileraartarnermut maleruagassani nalinginnaasuni pineqartunut ilaapput, taakkua malillugit akileraartussaatitaasoq nammineq isertitaminut tunngasut pillugit paasissutissanik eqortunik tamakkiisunillu akileraartarnermut oqartussanut paasissutissiisussaalluni. Akileraartussaatitaasup akileraaruserinermik ingerlatsineq pillugu Inatsisartut inatsisaat naapertorlugu, taamaalilluni ukiumoortumik nammineerluni nalunaarutiginninnermut atatillugu, isertitat suulluunniit akileraartarnermut ingerlatsivimmut nalunaarutigisussaavai. Akileraartussaatitaasup nammineerluni atukkani pillugit akileraartarnermut oqartussanut paasissutissiisussaatitaanera nalinginnaasoq, akileraartarnermut ingerlatsiviup eqortumik akileraarusiisinnaanissamut aammalu ingerlalluartumik akileraaruseeriaaseqarnissamik qulakteerinninnissamut, akileraartussaatitaasup aningaasaqarneranut tunngasut pillugit pisariaqartunut paasisimasaqarnissaannut tunngaviusumik pisariaqarpoq.

Paasissutissanut akileraartarnermut oqartussap akileraartussaatitaasumit tigusassaannut ilanngullugit, akileraaruserinermik ingerlatsineq pillugu Inatsisartut inatsisaanni kapitali 6 naapertorlugu allanit paasissutissanik akileraartarnermut oqartussat aamma tigusaqartarput. Maleruagassat atuunneranni allat arlallit kaammattorneqaratik akileraartarnermut ingerlatsivimmut paasissutissanik, allat akileraartarnerannut attuumassuteqartunik, tunniussisussaapput. Ilaatigut sulisitsisut sulisutik pillugit paasissutissanik arlalinnik akileraartarnermut oqartussanut tunniussisarput, taamatullu aningaaseriviit sullitatik pillugit paasissutissanik tunniussisarlutik. Tamatuma saniatigut akileraartarnermut oqartussat

akilerartussaatitaasup akileraartussaatitaanerminik naammassinnissimanersoq misissuinerminut atatillugu allanit paasissutissanik piniarnissamut periarfissaqarput.

Aningaasaqarnermik avitseqatigiinnermi attartortitsisut tassaanerusarput inuinnaat, suliassaqarfiup ingerlataqarfigisamik iluani akileraartarnermut maleruagassanik killilimmik ilisimasaqartut. Taamaalilluni attartortitsisut amerlasuunut tassani pineqarpoq nalinginnaasumik suliffiup il.il. saniatigut allamik ingerlataqarneq, taamaattumik ingerlatartik akileraaruteqaataasussaasoq eqqumaffiginnginnerusinnaallugu. Akileraartarnermut Aqutsisoqarfiup nammineerluni nalunaarsuiffissami naqeriikkami paasissutissat nalunaarutigineqarsimasut ilanngunnerisigut, akileraartussaatitaasumut tamanna akileraarutinik suliarinninnerup ingerlanera pisariinnerulersinneqartussaavoq.

Ingerlatseqatigiiffiit sullissinernik suliaqartut paasissutissiisussaatitaalerpata tamanna Akileraartarnermut ingerlatsivimmut paasissutissanik pissarsititsissaq, illumik aalaakkaasumik attartortitsinermut atatillugu akileraartussaatitaanerup pitsaanerusumik naammassineqarnissaa oqartussanit qulakkeerneqarsinnaalissalluni.

Tamatuma saniatigut pissarsisumut tunisat isertitatut B-tut isertitaappata, tunisassianik aalisarnermeersunik, piniarnermeersunik, aallaaniarnermeersunik, savaateqarnermeersunik, equmiitsulianeersunik kusanartulianeersunillu tuniniaanermik sullisisut paasissutissiisussaatitaassasut, siunnersuutip imaraa.

Pingarnertut siunnerfigineqartoq tassaavoq kommunini kalaalimineerniarfintuniniaaneq, kisianni aamma elektroniskimik sullissisarfikkoortumik allakkoortumilluunniit tuniniaaneq aamma siunnersuummi pineqartunut ilaavoq.

Siunnersuummi allanik tuniniaassussineq aamma tuniniaanerit allat, sullissisoq tuniniaassussinermi akissarsiassanik tigusaqartarluni, pineqartunut ilaapput. Kisianni tunisisarneq siunnersuutip avataaniippoq, tassami taamatut pisoqarnerani nalunaarutiginnittussaatitaaneq inatsimmi § 33 a, imm. 1 malillugu pisussaammat.

Sullisisartut paasissutissiisussaatitaanerat akileraartussaatitaanerup pitsaanerusumik naammassineqarnissaata qulakkeernissaanut iluaqutaassaaq.

Siunnersuut ataatsimut isigalugu akileraartussaatitaasumi aammalu akileraartarnermut oqartussani akileraarusiinissamut suliat ingerlanerata pitsaanerunissaata qulakkeernissaanut iluaqutaassaaq. Peqatigisaanik tamanna naligiimmik pinninnissamut aammalu unammilleqatigiinnermi assigiinnerusunik atugassaqartitsinissamut iluaqutaassaaq, kiisalu akileraaruteqarnaveersarnerit pinngitsoortinnissaannut iluaqutaassalluni.

2. Siunnersuummi immikkoortut pingaarnerit

Nunanut allanut atatillugu aningaasatigut kontut pillugit nalunaaruteqartussaatitaanermut tunngavigineqartumi piffissaq paarinniffiusussaq pillugu nunatsinni maleruagassat nunani tamalaani periutsinut naapertuutsinneqalissasut siunnersuutigineqarpoq.

Taamaalilluni nunanut allanut atatillugu paasissutissanik nalunaarutiginnittarnermut tunngavigineqartoq ulloq 1. maajimi ullup nalunaaruteqarnissamut killissarititaasup naaneranit ukiuni tallimani paarineqartassasoq siunnersuutigineqarpoq.

Siunnersuut malillugu tamanna isumaqarpoq aningaasaqarnikkut kontut pillugit 2018-imi paasissutissat tassungalu tunngavigineqartut aammalu kingusinnerpaamik ulloq 1. maj 2018-imi nalunaarutigineqartussat ulloq 1. maj 2024-p tungaanut paarineqassasut, ullumikkut allaanerulluni, tassa naatsorsuutinik tunniussisussaatitaasut naatsorsuutit taakkununngalu ilanngussat ukiup naatsorsuuseriffiusup naanerata kingorna ukiuni tallimani paarisussaallugit. Malittarisassat aamma atuupput aningaasaqarnikkut kontut nunanut allanut attuumassuteqartut pillugit nalunaaruteqartussaasunut. Tamatuma nassatarisaanik kontut 2017-imut atatillugu nalunaarutigineqartussaatitaasut pillugit paasissutissat aammalu 1. maj 2018-imi nalunaarutigineqartussaasut tamatumunngalu tunngavigineqartoq ulloq 31. december 2022-mit sivisunerusumik paarineqassanngillat.

Aammattaaq siunnersuutigineqarpoq digitalimik kiffartuussisarfikkoortumik illuummik aalaakkaasumik attartortitsinermik sullisisartoq, suut sullissiviusimanersut aammalu attartortitsisumut tamatumunnga akiliutit pillugit akileraartarnermut ingerlatsivimmuit paasissutissanik tunniussisassasoq.

Paasissutissiisussaatitaaneq allanut aningaasanik nuussinerit ilumut ingerlanneqarsimanerat pillugu paasissutissanik peqartunut killilerneqassasoq siunnersuutigineqarpoq, ilanngullugit sullissivigineqartup imarisai pillugit aammalu akiliutinik akiliinerit pillugit paasissutissat.

Siunnersuutigineqarpoq paasissutissiisussaatitaaneq aamma sullisisartunut digitalimik aallaaveqartut saniatigut allanik sullissinernik ingerlatitsivikkoortumik, kisianni attartortitsinermut akiliutit kiffartuussisarfikkoortumik ingerlanneqartarlutik, suliaqartartunut aamma atuutissasoq.

Kiisalu siunnersuutigineqarpoq kalaalimineerniarfinni, digitalimik aallaavigisani assigisaanniilluunniit tunisassianik aalisarnermeersunik, piniarnermeersunik, aallaaniarnermeersunik, savaateqarnermeersunik, eqqumiitsuliornermeersunik kusanartuliornerneersunillu akilerneqarlutik tuniniaassussisut, suut sullississutaasimanersut,

kikkut akiliutinik tigusaqarsimanersut aammalu aningaasat qanoq annertutigisut pissarsisussap tigusimanerai il.il. ukiut tamaasa akileraartarnermut ingerlatsivimmut nalunaarutigisassagai.

Inatsisissatut siunnersuut inatsisimmut atuuttumut sanilliullugu	
<i>Oqaasertaliinerit atuuttut</i>	<i>Inatsisissatut siunnersuut</i>
	<p style="text-align: center;">§ 1</p> <p>Akileraaruserinermik ingerlatsineq pillugu Inatsisartut inatsisaat nr. 11, 2. november 2006-imeersumi, kingullermik Inatsisartut inatsisaanni nr. 11, 1. juni 2017-imeersumi allanngortinneqartumi, makku allanngortinneqarput:</p>
	<p>1. § 18, imm. 4-p kingorna ilangunneqassaaq: <i>“Imm. 5. Akileraaruserinermik ingerlatsineq pillugu Inatsisartut inatsisaanni nr. 11, 2. november 2006-imeersumi § 35 a naapertorlugu malittarisassat atuutsinnejartut malillugit paasissutissanut nalunaarutigineqartussanut tunngavagineqartoq, tassungalu ilangullugu paasissutissat nalunaarutigineqartussasatitaanersut paasiniarneqarnissaani atorneqartussatut paasissutissat § 35 a naapertorlugu malittarisassat atuutsinnejartut malillugit nalunaaruteqartussaatitaanermut piffissaritinnejartup naaneranit ukiuni tallimani paarineqartassapput.”</i></p>
	<p>2. § 33 d kingorna ilangunneqassaaq: ” § 33 e. Digitalimik kiffartuussisarfikkoortumik illuutinik aalaakkasunik attartortitsinernik kiisalu taakkununnga akiliinernut sullissisoq, akileraarutissat annertussusilernissaannut atugassanik ukiut tamaasa</p>

	<p>kaammattorneqarani akileraartarnermut ingerlatsivimmut sullissinerup imarisai pillugit paasissutissiissaq, ilanggullugit attartornermut akiliutinik tigusisoq, immikkoortoq attartortinnejartoq, ullut unnuallu attartortitsiviusut, akiliutit ingerlateqqinnejartut annertussusaat, kontunormu attartornermut akiliiffiusoq pillugit paasissutissat, kiisalu attartortitsisoq pillugu paasissutissat, ilanggullugit aqqa, najugaa, cpr nr. assigisaaluunniit attartortitsisup qularnaatsumik kinaassusersinissaanut naleqquttoq.</p> <p>Paasissutissiisussaatitaaneq akunnittarfinnut, unnuisitsisarfinnut assigisaannullu inuussutissarsiutigalugu ingerlatanut, inimik imaluunniit inissiamik attartortitsinernik taamaallaat sullissivigineqartunut, atuutinngilaq. <i>Imm. 2.</i> Imm.1 malillugu paasissutissiisussaatitaaneq aamma illuutinik aalaakkaasunik attartortitsinernik sullissinernut, digitalimik kiffartuussisarfikkoortumik ingerlannejartunut, kiffartuussinermut akiliuteqarneq kiffartuussisarfikkoortumik ingerlannejarsimappat, aamma atuuppoq.</p> <p><i>Imm. 3.</i> Paasissutissiisussaatitaaneq akunnittarfinnut, unnuisitsisarfinnut assigisaannullu inuussutissarsiutigalugu ingerlatanut, inimik imaluunniit inissiamik attartortitsinernik taamaallaat sullissivigineqartunut, atuutinngilaq.</p> <p><i>Imm. 4.</i> Naalakkersuisut imm. 1 aamma 2 malillugit paasissutissanik tunniussisarneq pillugu maleruagassanik erseqqinnerusunik aalajangersaasinjaapput.</p> <p>§ 33 f. Akilerneqarluni tunisassianik aalisarnermeersunik, piniarnermeersunik,</p>
--	---

	<p>aallaaniarnermeersunik, savaateqarnermeersunik, kusanartulianeersunik imaluunniit eqqumiitsulianeersunik tuniniaanernik sullissisoq, tuniniaaneq inuussutissarsortumut B-tut isertitaqaataappat, akileraarutissat annertussusilernissaannut atugassanik ukiut tamaasa kaammattorneqarani akileraartarnermut ingerlatsivimmut aqqa, najugaa aamma cpr nr. paasissutissiissutigalugit sullissinerup imarisai pillugit paasissutissiissaq, ilanngullugit tunisassianut akiliutinik tigusisussaq, kiisalu akiliutit ingerlateqqinnejartut annertussusaat pillugit paasissutissat.</p> <p><i>Imm. 2. Naalakkersuisut imm. 1 malillugu paasissutissanik tunniussisarneq pillugu maleruagassanik erseqqinnerusunik aalajangersaasinjaapput.”</i></p>
	<p style="text-align: center;">§ 2</p> <p>Inatsisartut inatsisaat ulloq 1. januar 2020-mi atuutilerpoq.</p>

3. Pisortanut aningasaqarnikkut allaffissornikkullu sunniutaasussat

Siunnersuut akileraarutinik suliaqarnerit ingerlanerisa pitsaanerulernissaannik
 qulakkeerinnejataassaaq.

Allanit nalunaarutiginninneq pisuni amerlasuuni naammassinninnerup qaffasinnerulerneranik
 aammalu nalunaarutiginninnerup pitsaanerulerneranik malitseqartarpooq.

Paasissutissiisussaatitaanerit nutaat aaqqissuussinerup atuutsinnejalerneranut atatillugu
 aningasaartuuteqarnerulerermik malitseqassasut naliliisoqarpoq, ilanngullugit edb atorlugu

periaatsinik pioreersunik naleqqussaaneq, kiisalu paasissutissat tiguneqartut pitsaassusaat naammaginarnersoq qulakkeerneqarnissaanut atatillugu isumalluutinik atuinerulernissaq, pingoartumik atuutsitsilernerup nalaani. Taamaattoq paarlattuanik naammassinnitarneq qaffasinnerulerpat aammalu nalunaarutiginninnerup pitsaassusaa pitsaanerulerpat, isumalluutit ullumikkut akileraarusiinissamut atatillugu atorneqartartut ilai allamut atorsinnaalissasut naatsorsuutigineqarpoq.

Akileraarutitigut isertitaqarnerulernissaq naatsorsuutigineqartoq ukiuni aggersuni akileraarutinik akiliutissanik aalajangersaanermi nalorninartortaaareersut iluanniimmata, 2020-mut kingormaniittunullu akileraarutitigut isertitassatut missingorsorneqareersut allanngortinnissaat pisariaqarsorineqanngilaq.

Paasissutissiisussaatitaanernut nutaanut atatillugu aningaasartuutaanerulersussat, ilanngulligit edb atorlugu periaatsinik pioreersunik naleqqussaaneq, kiisalu paasissutissat tiguneqartut pitsaassusaat naammaginarnersoq qulakkeerneqarnissaanut atatillugu isumalluutinik atuinerulernissaq, pingoartumik atuutsitsilernerup nalaani, aningaasarsianut katillugit 250.000 koruunit missaannik aammalu 2020-mi aamma 2021-mi Akileraartarnermut Aqutsisoqarfimmi IT-mut aningaasartuutaanerulersussanut 250.000 koruunit missaannik annertussuseqassasut naatsorsuutigineqarpoq. Aningaasartuutaanerusussat taakkua, inatsisisssatut siunnersuut manna akuerineqassappat, AIS 2020-p aappassaanneerdeqarnissaanut allannguutissatut siunnersuutitut ilanngunneqassapput.

4. Inuussutissarsiortunut aningaasaqarnikkut allaffissornikkullu sunniutaasussat

Aningaasatigut kontunik nunanut allanut attuumassutilinnik nalunaaruteqartarnermut tunngavigineqartumut atatillugu piffissap paasissutissanik paarinniffiusussap allanngortinneqarnissaanik siunnersuut inuussutissarsiutinik ingerlataqartunut aningaasaqarnikkut kinguneqassanngitsoq nalilerneqarpoq.

Aammattaaq aningaasaqarnikkut suliffeqarfiit nalunaaruteqartussasut piffissap paasissutissanik paarinniffiusussap sivitsorneqarnerata kingunerisaanik paasissutissanik piaanissap kinguartinneqarnissaanik pisussaaffilerneqarnissaat pissutigalugu siunnersuut inuussutissarsiutinik ingerlataqartunut allaffissornikkut killilerujussuarmik kinguneqassaaq.

Ingerlatitseqqinnermik ingerlatseqatigiiffit aammalu attartortitsisarnermik imaluunniit aalisarnikkut tunisassianik inuussutissarsiuteqarnerup iluani sullisisartutut suliaqartut paasissutissiisussaatitaanerat pillugu siunnersuut, attartortitsisoq aammalu attartortinneqartoq pillugit paasissutissanik suussusersiinissamut aamma piniarnermut atatillugu kiisalu akileraartarnermut ingerlatsivimmut nalunaarutiginninnermut atatillugu allaffisornermut saniatigut aningaasartuuteqarnissaq naatsorsuutigisariaqarpaat.

Paasissutissat suut ingerlatseqatigiiffit sullisisartut tigoreertarneraat, aningaaasartuutinut apeqquataassaaq.

5. Avatangiisinut, pinngortitamut inuillu peqqissusaannut sunniutaasussat

Siunnersuut avatangiisinut, pinngortitamut imaluunniit inuit peqqissusaannut sunniuteqassanngilaq.

6. Innuttaasunut sunniutaasussat

Siunnersuut ingerlatitseqqinnermik ingerlatseqatigiiffit aammalu attartorttsisarnermik imaluunniit aalisarnikkut tunisassianik inuussutissarsiuteqarnerup iluani sullisisartutut suliaqartut eqqornerusumik akileraarutinik akiliisarnissaannut qulakkeerinneqataassaaq.

Paasissutissat piniarneqartut nammineerluni nalunaarsuiffimmut inissinneqareertassapput, tamannalu akileraarusiinernik suliaqarnerit ingerlaneranni akileraartussaatitaasumut pisariinnerulersitseqataassasoq, peqatigisaanillu akileraarutinik akiliuteqarnerit eqqornerulernissaannik qulakkeerinissasoq, naatsorsuutigineqarpoq.

Siunnersuut innuttaasunut allaffissornikkut sunniuteqassanngilaq.

7. Sunniutaasussat annertuut allat

Siunnersuut allanik annertuunik sunniuteqassanngilaq.

8. Oqartussat kattuffiillu il.il. tusarniaaffigineqarnerat

Siunnersuut piffissami 25. marts 2019-imit 29. april 2019-ip tungaanut ukununnga tusarniaassutigineqarpoq: Deloitte, Grønlands Revisionskontor, BK Revision, Ey Grønland, GrønlandsBanken, BankNordik, Sulisitsisut, NUSUKA, SIK, KANUNUPE, Naalakkersuisut Siulittaasuata Naalakkersuisoqarfia, Inuussutissarsiornermut Nukissiuuteqarnermullu Naalakkersuisoqarfik, Ineqarnermut Attaveqaqatigiinnermullu Naalakkersuisoqarfik, Pinngortitamut, Avatangiisinut Ilisimatusarnermullu Naalakkersuisoqarfik, Ilinniartitaanermut, Kultureqarnermut Ilageeqarnermullu Naalakkersuisoqarfik, Peqqissutsimut Naalakkersuisoqarfik, Aatsitassanut Suliffeqarnermullu Naalakkersuisoqarfik, Isumaginninnermut Inatsisinillu Atuutsitsinermut Naalakkersuisoqarfik, Nunani allani Pissutsinut Naalakkersuisoqarfik, Aalisarnermut, Piniarnermut Nunalerinermullu

Naalakkersuisoqarfik, Kommuneqarfik Sermersooq, Qeqqata Kommunia, Kommune
Kujalleq, aamma Advokatforeningen.

Aammattaaq siunnersuut Naalakkersuisut tusarniaanermut nittartagaanni uani
www.naalakkersuisut.gl tamanut saqqummiunneqarpoq.

Tusarniaanermut piffissaliussap naanerani makkunangna tusarniaanermut akissuteqaatit
tiguneqarput: Peqqissutsimut Naalakkersuisoqarfik, Naalakkersuisut Siulittaasuata
Naalakkersuisoqarfia, Isumaginninnermut Inatsisinillu Atuutsitsinermut
Naalakkersuisoqarfik, Aatsitassanut Suliffeqarnermullu Naalakkersuisoqarfik, SIK,
BankNordik kiisalu Sulisitsisut.

Tusarniaanermi tigusat oqaaseqaateqarfiginissaat pisariaqartinneqarsimanngilaq.

Piffissap tusarniaaffiusup naareernerata kingorna siunnersuut nutaanik arlalinnik,
ningaasaqarnikkut kontut pillugit paasissutissanik uninngasuutiginninnissamut
tunngassuteqartunik, ilanngussisoqarpoq. Ilanngunneqartut piffissami 26. juni 2019 - 3. juli
2019 GrønlandsBankenimut, BankNordikimut, Sulisitsisunut, Inuussutissarsiornermut,
Nukissiuuteqarnermut Ilisimatusarnermullu Naalakkersuisoqarfimmit kiisalu SIK-mut
tusarniaassutigineqarput.

Tusarniaanermut piffissamut killiliussap naanerani Sulisitsisunit, Inuussutissarsiornermut,
Nukissiuuteqarnermut Ilisimatusarnermullu Naalakkersuisoqarfimmit kiisalu BankNordik-
imit tusarniaanermut akissuteqaatit tiguneqarput.

§ 33 f-imut nassuaatit § 33 e-mut nassuaatini allassimasut, Sulisitsisut tusarniaanermut
akissuteqaamminni oqaatigaat.

*Naalakkersuisut siunnersuummi nr. 2-mut nassuaatini kukkunermik nassaanngillat.
Taamaalilluni allanngortitsisoqanngilaq.*

Avannaata Kommunia kiisalu Kommune Qeqertalik Tusagassiivik apriilimi tusarniaalluni
siunnersuutip nassiunneqaqqarneranut atatillugu ajoraluartumik tusarniarneqarsimanngitsut,
tusarniaanermut akissuteqaatit atuarneqarnerannut atatillugu Naalakkersuisut
equmaffigilerpaat. Tusarniaaffigineqartut allassimaffiata nutarterneqanngitsup
atorneqarsimanera pissutaalluni, ajuusaarnartumik kukkusqarsimanera tassani pineqarpoq.

UPA 2018/xx

Taamaattumik siunnersuut tamarmiusoq piffissami 25. juni 2019-mi 30. juli 2019-mut
Avannaata Kommunianut kiisalu Kommune Qeqertalimmut Tusagassiivimmut
tusarniaassutigineqarpoq.

Tusarniaaneq oqaaseqaateqarnissamut pissutissaqalersitsisimannngilaq.

Siunnersummi aalajangersakkanut ataasiakkaanut nassuiaatit

§ 1-imut

Nr. 1-imut

§ 18, imm. 5-imut

Akileraaruserinermik ingerlatsineq pillugu inatsimmi § 18, imm. 1 naapertorlugu suliffeqarfimmik ingerlatsisup ingerlatsinermi ilaautut inatsit malillugu nalunaaruteqartussaatitaasoq paasissutissanut nalunaarutigineqartussaasunut tunngavigineqartoq paarissavaa, tassungalu ilanngullugit paasissutissaq nalunaarutigineqartussaanersoq pillugu aalajangiinissami paasissutissat atorneqartussat paarissallugit. Paarinninneq naatsorsuuserinermi atortussat paarineqartarnerat pillugu naatsorsuuserinermi inatsimmi malittarisassat malillugit pissaaq.

Inatsimmi tassani § 18, imm. 4 malillugu naatsorsuutinik takutitsisussaatitaasup ukiup naatsorsuuseriffiusup atortusanut attuumassuteqartup naaneranit naatsorsuuserinermi atortussat ukiuni 5-ini paarissavai.

Akileraaruserinermik ingerlatsineq pillugu inatsimmi § 18-imi imm. 5 nutaaq ilanngunneqassasoq siunnersuutigineqarpoq, taanna malillugu akileraaruserinermik ingerlatsineq pillugu inatsimmi § 35 a naapertorlugu maleruaqqusat atuuttut malillugit paasissutissanut nalunaarutigineqartussanut tunngavigineqartoq, tassungalu ilanngullugu paasissutissat nalunaarutigineqartussaatitaanersut pillugu aalajangiinissamut atugassat akileraaruserinermik ingerlatsineq pillugu inatsimmi § 35 a naapertorlugu maleruaqqusat atuutsinneqartut malillugit piffissap nalunaaruteqarfiusussap naaneranit paasissutissat ukiuni 5-ini paarineqartassallutik. Akileraaruserinermik ingerlatsineq pillugu inatsimmi § 35 a aningaasanut kontut USA-mut attuumassuteqartut ilisimanissaat nalunaarutigineqarnissaallu pillugit Namminersorlutik Oqartussat nalunaarutaat nr. 5, 3. maj 2017-imeersoq aammalu aningaasatigut kontunik nunanut allanut attuumassutilinnik kinaassutsimik uppernarsaasarneq nalunaaruteqartarnerlu pillugu Namminersorlutik Oqartussat nalunaarutaat nr. 13, 30. august 2017-imeersoq naapertorlugit atuutsinneqalerpoq.

Siunnersuutip nassatarisaanik nalunaarutit taakku 2-t malillugit atortussat nalunaaruteqartussaanermi tunngavigineqartut nalunaarutit malillugit nalunaaruteqartussaanermut killissarititap naanerata kingorna sivikinnerpaamik ukiuni 5-ini paarineqartassapput. Killissarititaasoq tassaavoq qaammatisiutit ukiuata nalunaaruteqarfiusussap kingorna ulloq 1. maj. Ulloq 1. maj arfininngorneruppat, sapaataappat ullorluunniit nalliuuttuuppat killissarititaq tassaavoq ulluinnaq tulliuttoq. Taamaaqataanik atortussat aningaasaqarnikkut kontu nalunaarutaasussaatitaanersoq pillugu

aalajangiinissamut tunngavagineqartut piffissami tassani aamma paarineqartassapput.
Nalunaarutit malillugit kontut nalunaarutigineqartussaatitaasut suussusersiniarneranni
periutsinut atorneqartunut atortussat taakku paasissutissaassapput.

Kalaallit Nunaata suliassaqarfimmi tamatumani nunani tamalaani periutsinik
malinninnissaanut allannguutit taakku qulakkeerinnissapput.

Nr. 2-mut

§ 33 e-mut

Imm. 1-imut

Imm. 1-imi aalajangersakkami digitalimik kiffartuussisarfikkoortumik illuutinik
aalaakkaasunik attartortitsinernik sullisisup akileraartarnermut ingerlatsivimmuit
paasissutissiisussaatitaalernerataatuutsinneqalerpoq. Paasissutissiisussaatitaaneq nammineq
attartortitsinermut tunngasorpiami peqataanani illumik aalaakkaasumik attartortitsinermik
suliaqarsimasumut, atuuppoq.

Sullisisup attartortitsinermik sullissinerminut ilanngullugu aamma attartornermut akilummik
ingerlatitseqqissimalluni pisoqarnerinut, paasissutissiisussaatitaaneq killilerneqarpoq.
Attartortitsinermik tassungalu akiliinermik sullissisoq susorlu assigiissasut
piumasaqaataanngilaq. Niuernikkut kiffartuussiviusartup aamma akiliisitsiviusartup imminnut
atassuserneqarsimanerat naammappoq.

Paasissutissiisussaatitaaneq akunnittarfinnut, unnuisitsisarfinnut assigisaannullu
inuussutissarsiutigalugu ingerlatanut akunnittarfimmi il.il. inimik, inissianik attartortitsinernik
taamaallaat sullissivagineqartunut, atuutinngilaq, tassami attartortitsinermi isertitat
ingerlatsinermi isertitatut nalinginnaasutut suliffeqarfimmi ilaatinneqassammata,
taamaalillutillu akileraartarnermut inatsimmi nalinginnaasumik upternarsaasiinissamik
piumasaqaateqarnermi pineqartunut ilaallutik.

Sullisisup paasissutissanik sunilluunniit akileraartarnermut ingerlatsiviup eqqortumik
akileraarusiisinnaanissaanut pisariaqartunik Akileraartarnermut ingerlatsivik
nalunaarfigissavaa. Paasissutissiisussaatitaanermi ilaatigut attartortitsinermut isumaqatigiissut
aammalu attartornermut tassunga akiliutit pillugit paasissutissat pineqartunut ilaapput,
ilanngullugit ullut unnuallu attartorfiusut amerlassusaat kiisalu akiliutip annertussusaa.

Tamatuma saniatigut paasissutissiisussaatitaanermi attartortitsisoq pillugu paasissutissat
pineqartunut ilaapput, ilanngullugit atia, najugaa, cpr nr. assigisaaluunniit kiisalu kontunormu,
attartornermut akiliutip akilerneqarfissa. Paasissutissat suussusersinissaannut ilanngullugu,

paasissutissiisussaatitaasup nammineq atini aamma cvr.nr.-ini atorlugu kinaassutsiminik nalunaarutiginninnissa pisariaqarpoq.

Paasissutissiisussaatitaaneq attartortittakkamut tunngassuteqarpoq, taamaattumillu attartortitsinissamut isumaqatigiissut, attartortitsisoq aamma sullisisua pillugit paasissutissanut ilanngullugu attartortittakkanut ataasiakkaanut tamanut paasissutissanik nalunaarutiginnittooqassaaq. Attartortittagaq isumaqarpoq illumumi aalaakkaasumi unnuinissamut periarfissat ataasiakkaat, attartortitsinermi isertitaqarfiusartut, tamarmik. Paasissutissani illuutip najugaa imaluunniit illuutip normua ilaatinneqassapput.

Imm. 2-mut

Imm. 2-imi aalajangersakkani aalajangersarneqarpoq, paasissutissiisussaatitaaneq aamma sullisisup assersuutigalugu attartortitsisoq sinnerlugu illumumi aalaakkaasumi attartortitsinissaq pillugu isumaqatigiissuteqarnerani, taannalu aqqutigalugu attartortitsinermut akiliinernik suliaqarnerani, sullisisunut digitalimik aallaaveqarnerit aqqutigalugit pisartut saniatigut sullissinermi aqqutigineqartut allat aqqutigalugit sullisisartunut atuuttoq.

Allat allagarsiivissat assigisaalluunniit aqqutigalugit taamaallaat attartortitsisitsartut, taamaaliornermanni tamatumunnga atatillugu attartortitsinermi akuunatik, ilanngullugit attartortitsisup aamma attartortup akornanni isumaqatigiissut imaluunniit attartortitsinermut akiliuteqarnerit, paasissutissiisussaatitaanermi pineqartunut ilaanggillat.

Imm. 3-mut

Imm. 3-imi aalajangersakkami aalajangersarneqarpoq Naalakkersuisut nalunaarummi ilaatigut paasissutissiisussaatitaanermut piumasaqaatinik annertunerusunik aalajangersaasinnaasut, ilanngullugu paasissutissat qanoq iluseqartillugit tunniunneqassanersut.

§ 33 f-imut

Imm. 1-imut

Imm. 1-imi aalajangersakkami aalajangersarneqarpoq kalaalimineerniarfikkortumik, digitalimik aallaavigisakkoortumik assigisaanniilluunniit tunisassianik aalisarnermeersunik, piniarnermeersunik, aallaaniarnermeersunik, savaateqarnermeersunik, eqquumiitsuliornermeersunik kusanartuliornerneersunillu akilerneqarlutik tuniniaassussisut, suut sullississutaasimanersut, kikkut akiliutinik tigusaqarsimanersut aammalu aningaasat qanoq annertutigisut pissarsisussap tigusimanerai il.il. ukiut tamaasa akileraartarnermut ingerlatsivimmut nalunaarutigisassagi.

Paasissutissiisussaatitaaneq akilerneqarlutik tunisassianik pineqartunik tuniniaasitsisunut tamanut atuuppoq. Tuniniaaneq assersuutigalugu kalaalimineerniarfik kommunimit

pigineqartoq aqqutigalugu ingerlanneqarpat, aammalu kommuni tunisanut akiliuteqartitsisarpat, kommuni nalunaarutiginnittussaatitaavoq.

Tuniniaasitsisoq akiliummik tigusaqarsimanngippat, pineqartoq nalunaarutiginnittussaatitaassanngilaq. Aalisartoq assersuutigalugu inuit akornanni attaveqatigiittarfinni allagarsiinikkut aalisakkanik tunisaqarsimappat, attaveqatigiittarfik pineqartoq tamatumunnga akiliuteqarfingineqarani, attaveqatigiittarfik nalunaarutiginnittussaatitaassanngilaq.

Akiliutitut isigineqarput aningaasat tunisassiap pineqartup tuniniarneranut akiliutigineqartut.

Sullisisutut isigineqarpoq akilerneqarluni tunisassianik pineqartunik tuniniaassussisoq.

Paasissutissiisussaatitaanermi pineqarput ateq, najugaq, cpr nr. kiisalu kontunormu nioqqtissanut akiliutinik akiliiffiusoq pillugit paasissutissat.

Imm. 2-mut

Imm. 2-imi aalajangersakkami aalajangersarneqarpoq, Naalakkersuisut nalunaarummi ilaatigut paasissutissiisussaatitaanermut piumasaqaatinik annertunerusunik aalajangersaasinnaasut, ilanngullugu paasissutissat qanoq iluseqartillugit tunniunneqassanersut.

§ 2-mut

Inatsisartut inatsisaat ulloq 1. januar 2020-mi atuutilissasoq siunnersuutigineqarpoq.